

UDHËZIM
Nr. 29, datë 18.12.2014

**PËR PËRCAKTIMIN E TARIFËS SË
SHËRBIMIT PËR PËRDORIMIN E
APARATEVE TELEVIZIVE**

Në mbështetje të nenit 102 pika 4 të Kushtetutës dhe të nenit 11 të ligjit nr. 9975, datë 28.7.2008 “Për taksat kombëtare”, ministri i Financave dhe drejtori i përgjithshëm i Radio-televizionit Shqiptar

UDHËZOJNË:

1. Tarifa e shërbimit për përdorimin e aparateve televizive është 100 (një qind) lekë, për çdo muaj kalendarik.

2. Tarifa paguhet nga përdoruesit familjarë dhe nga përdorues të tjerë jofamiljarë. Përdoruesit familjarë paguajnë tarifën vetëm për një marrës televiziv, pavarësisht nga numri i aparateve që kanë në familje. Përdoruesit e tjerë jofamiljarë paguajnë tarifën për çdo aparat televiziv.

3. Operatori i Shpërndarjes së Energjisë Elektrike (OSHEE) caktohet agent për mbledhjen e tarifës së shërbimit për përdorimin e aparateve televizive. Mbledhja e kësaj tarife bëhet çdo muaj.

4. Faturat tatimore të energjisë elektrike të OSHEE-së kanë në fund, si një zë më vete, tarifën e shërbimit për përdorimin e aparateve televizive, sipas udhëzimit të ministrit të Financave për tatimin mbi vlerën e shtuar.

5. Mbi tarifën e shërbimit, të përcaktuar në këtë udhëzim, nuk aplikohet tatimi mbi vlerën e shtuar.

6. Pagesat e tarifës vërtetohen për përdoruesit në librezën e pagesës së energjisë elektrike, ku shënohet “tarifa e paguar për muajin _____, data e pagesës, si dhe firma dhe vula e punonjësit të ngarkuar me vjeljen e kësaj tarife”.

7. OSHEE-ja, në cilësinë e agentit të mbledhjes së kësaj tarife, është i detyruar:

a) të bëjnë një deklaratë për çdo muaj për të ardhura nga tarifa, jo më vonë se 15 ditë pas përfundimit të muajit për të cilin bëhen deklaratimet;

b) të paguajnë për llogari të Drejtorisë Rajonale Tatimore tarifën kombëtare të arkëtuar për atë muaj në datën ose para datës së detyrueshme të deklaratës.

Për pagesën me vonesë të shumave të arkëtuara nga tarifa për agentin zbatohen sanksione sipas dispozitave të ligjit nr. 9920, datë 19.5.2008 “Për procedurat tatimore në Republikën e Shqipërisë”, të ndryshuar. Për shkeljet sipas përcaktimeve të nenit 117 të ligjit nr. 9920, datë 19.5.2008 “Për procedurat

tatimore në Republikën e Shqipërisë”, të ndryshuar, për agentin e tarifës zbatohen sanksionet e përcaktuara në këtë nen.

c) Deklarata bëhet në formën dhe përmbajtjen që përcaktohet me udhëzim të ministrit të Financave nr. 26, datë 4.9.2008, “Për taksat kombëtare”, të ndryshuar.

Deklarata për pagesën e tarifës kombëtare plotësohet dhe dorëzohet vetëm në mënyrë elektronike nga OSHEE nëpërmjet faqes zyrtare të internetit të Drejtorisë së Përgjithshme të Tatimeve www.tatime.gov.al. Deklarata konsiderohet e dorëzuar, në datën e dërgimit elektrik të deklaratës së plotësuar. OSHEE-ja duhet të dorëzojë deklaratën edhe në qoftë se për periudhën tatimore nuk kanë për të paguar detyrime për tarifat.

Mosdeklarimi brenda datës 15 të muajit pasardhës, i çdo periudhe tatimore nga agjenti i tarifës kombëtare, ndëshkohet me gjobë për mosdeklarim sipas dispozitave të ligjit nr. 9920, datë 19.5.2008 “Për procedurat tatimore në Republikën e Shqipërisë”, të ndryshuar.

8. Nuk janë subjekt i pagimit të tarifës së shërbimit për përdorimin e aparateve televizive:

a) Për përdoruesit familjarë

- Invalidët dhe veteranët e Luftës kundër Pushtuesve Nazifashistë të Popullit Shqiptar, invalidët e punës, të verbrit, invalidët paraplegjikë dhe tetraplegjikë që e fitojnë këtë status në bazë të ligjit nr. 7874, datë 17.11.1994 “Për statusin e veteranit të Luftës kundër Pushtuesit Nazifashist të Popullit Shqiptar”, të ndryshuar, ligjit nr. 8098, datë 28.3.1996 “Për statusin e të verbrit” dhe ligjit nr. 7889, datë 14.12.1994 “Për statusin e invalidit”.

Veterani i luftës, invalidi i luftës apo i punës, personat e verbër, si dhe të sëmurët paraplegjikë dhe tetraplegjikë duhet të paraqesin pranë zyrës së OSHEE sh.a., në momentin e pagesës së faturës së energjisë elektrike, librezën përkatëse, së bashku me dokumentin e identifikimit të personit që përfiton përjashtimin nga tarifa. Nëpunësi i zyrës së OSHEE sh.a., mban një kopje të librezës, në të cilët vendoset shënimi “përjashtuar nga tarifa”.

b) Për përdoruesit jofamiljarë:

-përfaqësitë diplomatike të akredituara në Republikën e Shqipërisë, në bazë të parimit të reciprocitetit;

-bashkësitë fetare që kanë nënshkruar marrëveshje me Këshillin e Ministrave;

-faturimi i energjisë elektrike për aktivitete, të tilla si: miniera, ujësjellës, pusët e naftës, furnizimi i antenave të telefonisë celulare, “ndriçimi publik i rrugëve” dhe garazhe të mjeteve lëvizëse;

-në rastet kur palë në kontratën e konsumit të energjisë elektrike është një subjekt që operon në sektorin e ndërtimit, tarifa llogaritet dhe paguhet nga momenti i kalimit të kontratës në emër dhe për llogari të personit fizik, juridik apo individit pronar i ambientit për të cilin faturohet energjia.

9. Institucionet e përcaktuara në shtojcën nr. 1, bashkëlidhur këtij udhëzimi, i përcjellin kompanisë OSHEE, brenda datës 15 janar të çdo viti, listën emërore të kategorive të përjashtuara nga pagimi i tarifës së shërbimit për përdorimin e aparateve televizive, si dhe gjatë vitit përditësimet përkatëse, nëse ka.

10. Për shërbimin e kryer, OSHEE-ja mban 10% komision të llogaritur mbi masën e tarifave që ka arkëtuar dhe deklaron dhe paguan në llogarinë e drejtorisë rajonale tatimore ku është e regjistruar 90% e shumës së arkëtuar.

OSHEE-ja vetëlogarit shumën që përfiton nga komisioni, duke shumëzuar përqindjen e komisionit të përcaktuar me këtë udhëzim të përbashkët me vlerën e arkëtimeve nga tarifat për periudhën tatimore dhe mban drejtpërsëdrejti vlerën e komisionit që përfiton, si dhe deklaron dhe paguan në llogari të Drejtorisë Rajonale Tatimore, shumën e mbetur, pasi zbritet vlera e komisionit që përfiton.

11. Udhëzimi nr. 1, datë 8.1.2009 “Për përcaktimin e tarifës së shërbimit për përdorimin e aparateve televizive”, i ndryshuar, shfuqizohet.

12. Ky udhëzim hyn në fuqi menjëherë dhe publikohet në Fletoren Zyrtare.

MINISTRI I FINANCAVE

Shkëlqim Cani

DREJTORI I PËRGJITHSHËM I
RADIOTELEVIZIONIT SHQIPTAR

Martin Leka

SHTOJCA NR. 1 : INSTITUCIONET PËRGJEGJËSE PËR DHËNIEN E INFORMACIONIT MBI KATEGORITË E PËRJASHTUARA

Përshkrimi i kategorive	Institucionet përgjegjëse për dhënie e informacionit mbi kategoritë e përjashtuara
Të verbrit/ paraplegjikë/tetraplegjikë	Shërbimi Social Shtetëror (SHSSH).
Veteranë lufte	Ministria e Mbrojtjes.
Invalid pune	Instituti i Sigurimeve Shoqërore (ISSH).
Përfaqësitë diplomatike të akredituara në Republikën e Shqipërisë në bazë të parimit të reciprocitetit, ambasadat	Ministria e Punëve të Jashtme
Bashkësitë fetare	Komuniteti Mysliman i Shqipërisë, Kisha Ortodokse Autoqefale e Shqipërisë, Kisha Katolike në Shqipëri, Kryegjyshata Botërore Bektashiane dhe Vëllazëria Ungjillore e Shqipërisë, Komuniteti Shtetëror për Kultet.
Faturimi i energjisë elektrike për aktivitete, të tilla si: miniera, ujësjellës, pusët e naftës, furnizimi i antenave të telefonisë celulare, ndriçimi publik i rrugëve dhe garazhet e mjeteve lëvizëse.	Ministria e Energjitikës dhe Industrisë.
Puse naftë	Ministria e Energjisë dhe Industrisë
Ujësjellës	Ministria e Transportit dhe Infrastrukturës
Antena celulare	Autoriteti i Komunikimeve Elektronike dhe Postare (AKEP)
Ndriçimi publik i rrugëve	Bashkitë
Garazhet e mjeteve lëvizëse	Sipas përcaktimeve të bëra në faturën e energjisë